

**■ TRIBUNA POLITICA**

# Ina lescha da linguas per il chantun Grischun

DA CLAUDIO LARDI,  
CUSSEGLIER GUVERNATIV

Ina da las cartas da visita, l'gea schizunt la noda-chasa da noss chantun è la trilinguitad, ina part impurtanta da nossa identitad ed in tratg caracteristic grondius dal Grischun. I na dat strusch in discours, strusch in'occurrènz, strusch in bainvegni per giasts svizzers u esters, senza che la particularitad da la diversitad linguistica e culturala da noss chantun vegnia punctuada e suttastritgada. Cun superbia giustifitgada e conscients da nus sezs renviain nus a la diversitad linguistica ed al fatg che las differentas cumanzas linguisticas vivan ina cun l'autra ed ina sper l'autra en moda paschaivla.

La nova constituiziun chantunala exprima questa diversitad cun ina incumbensa cumplexiva a la politica da linguas e cun in cler confess a la trilinguitad, al mantegniment ed a la promoziun da la lingua rumantscha e taliana sco er a la protecziun da las linguas tradiziunals en lur territoris oriunds. Tras la lescha da linguas, davart la quala nus votain ils 17 da zercladur, vegn ademplita questa incumbensa constituiziunala. Questa lescha regla il diever da las linguas uffizialas per las autoritads chantunals, cuntegna mesiras per mantegnair e per promover la lingua rumantscha e taliana



e franchises principis per attribuir las vischnancas ad in territoris linguistic.

La lescha da linguas saja l'anticonstituiziunala, nundemocratica e cuntraproductiva per las minoritads linguisticas, argumenteschan las adversarias ed ils adversaris dal project. Grevas renfatschas, sch'ins considerescha che la lescha è vegnida deliberada unanimamain dal cussegl grond. En realitad dentant na vegn la gronda part da la populaziun da noss chantun betg u strusch a sentir consequenzas pervi da la lescha da linguas. Tant pli fai surstar che la critica deriva da la part tudestga dal Grischun, per la quala la lescha na vegn betg ad avair ina influenza directa. Naginas Grischunas tudestgas e nagins Grischuns tudestgs na vegnan rumantschads u quintads nunvalidamain tar la populaziun rumantscha u taliana. Naginas abitantas tudestgas e nagins abitants tudestgs da noss chantun na vegnan disfavourisads.

Ma er las vischnancas che han midà gia en il passà lur lingua uffiziala e lur lingua da scola, p. ex. dal rumantsch al tudestg, na ston betg temair la lescha da linguas. Cuntrari a las pretendens da las criticas e dals criticers resta en questas vischnancas tut uschia sco ch'igl è. Cunzunt na pretendenda la lescha da linguas da naginas vischnancas ch'ellas stoppian puspè annullar ina midada da lingua ch'è gia vegnida fatga. La finamira la pli impurtanta da la lescha è vairamain quella da mantegnair e da dar ina protecziun minimala a las linguas periclitadas rumantsch e talian en lur territoris tradiziunals.

La lescha da linguas è l'expressiun da la solidaritad, dal respect e da la reconuschienscha da las minoritads linguisticas – ellas che dovran ina tgira speziala da vart da la maioritad tudestga. Perquai appellesch jau a tut las votantas ed a tut ils votants da metter explicitamain in segn curaschus e d'approvar la lescha da linguas cun in cler «gea». En questa votaziun na vai betg per pedantaria egoistica, ma bain per solidaritad vivida en l'interess da l'entir chantun e da tut las gruppaiziuns linguisticas. Lain declerar generusamain che nus renconuschian la trilinguitad chantunala, in dals pilasters principals da nossa identitad.